

曰方舟翰林修撰彭汝器爲之賦平生交遊盡
當世名人如內翰王恭高棟御史劉恒哲進士
王錫皆爲密友翰林王褒送公歸閩序曰父子
聯芳兄弟競爽其在閩粵之南乎亦可謂一時
之盛稱矣

溪山集卷之一

溪山愚叟陳航著

五言古體

讀諸葛武侯傳

孔明天下士風懷王霸略方其南陽時自比管
與樂時人未見許屈已事耕鑿巍巍山中喬憤
憤求民瘼傾蓋草廬中風雲沛然作快準翔秋
旻巨魚縱大壑感激遂馳驅艱難爰究度破魏
若摧枯收岷如振落先鼎雖未還六尺已先托

溪山集 卷一
義聲旣播揚天意何顛錯渭水旌旗還成都日
月索江漢達巴黔咸秦通劔闕惟聞梁父吟千
秋仰如昨

讀史

晉氏昔云盛著統兼全吳風雲相契合咨詢亦
都俞要路禮英俊四海幸無虞謂當致太平何
乃方崇虛亢首漸荒晏臣鄰復舒徐經國忽遠
計貽謀少訐謨清談貴莊老散淡輕名儒措身
廟廊上放懷山水隅遂使衣冠曹酣歌皆迷途
泄泄成流俗藥救難貯儲醉生與夢死儔能返
其初迨乎懷惠際骨肉起相屠兄弟不自保皆
爲劉石驅排墻竟何慘縉紳同釜魚歸罪一夷
甫作俑者誰歟哀哉難重陳警戒在斯圖

讀南唐書

載觀南唐書凡例詳去取尊王豈依周篡竊或
容與吾聞五代末生民蕩無主天光分四耀疆
場互彼此朱梁起盜賊沙陲與北土岌岌石晉
間茸心去臣虜夫何馬令書大綱不一舉豈有

溪山集 卷一
兒皇帝尚可稱天子三復傷我心欲告將誰語
不有朱紫陽誰爲秩天敘

讀鄂王傳

岳侯忠孝人義烈常耿耿觀其恢復論豈獨一
將領訐謨震羣僚威聲懾四境當時不盡聽母
乃輕九鼎

題商山四皓

引領盼層巔遙見四老人蒼顏映綠水一一嚴
衣巾望之卽再拜重是古先民或云黃與綺於
此避強秦至德尚可想遐蹤浩無隣翩然若儀
鳳覽德翔秋旻亡國失大老興邦得祥麟威容
動黼宸問答何精神明兩有餘慶偏愛遂淪湮
至今仰遺烈英氣猶振振

題嚴子陵

飲盡桐江水采遍富春山不羨波底魚難垂手
中竿耕鑿有真樂衡茅無苦顏一朝遇物色千
里涉河關下車竟不屈特立人所難遂令天下
士千秋仰遐觀

吾愛嚴子陵高臥富春渚手持一釣竿朝夕何
容與玄纁九天來睿想頗延佇親臨竟莫屈共
榻成賓主客星胡爲來如是久相許

題李密乘牛圖

魏公少髦俊弱冠已成名不得親仗下遂辭侍
衛榮折節讀漢史乘犢來咸京路逢楊令公談
笑清風生定交玄感輩竊發何易輕虎口雖見
兎龍飛竟無成我來過洛口空有蒲山營古戍
絕烽火中原息戰爭雄才不可見落日啼猩猩
披圖忽愴恍舉酒爲之傾

虎溪三笑

遠公禪門秀宴坐東林裏絕迹避諠囂不度虎
溪水抑且偶忘形相邀過清泚忽聞於菟聲大
笑不能已元亮憤欲歛脩靜冠將委丰采動林
巒聲音响涯涘逸韻當時稱高風後人紀載瞻
撫斯圖詠歌仍仰止

王質觀棋

世人好神仙孰識神仙面縱使偶相逢亦猶不

曾見王質本樵夫採薪出郊甸路傍觀奕棋豈
悟斧柯變彷彿俗緣牽躊躇反鄉縣兒童非昔
人歲月如驚電烟夢迷舊跡山川阻遊衍火棗
竟寥寥引領徒欽羨

許由棄瓢

昔日許由子棲遁居深山萬乘不肯顧一瓢常
自閒奈何天風來吹之聲珊珊恥爲此物聒棄
之於波瀾旣無煩雜累始覺神思安視彼患失
者豈特霄壤間我欲追其人高義不可攀細讀

莊氏語幸然窺一斑或者謂茫昧疑信恐相干
隨俗固無必立異良亦難

青山明月圖

明月照青山山青淨如洗草木被光輝巖巒皆
可矣愛此不能眠一坐四五起念我同心人何
時寄雙鯉

文峰小隱贈任逸人

吾少慕貞隱歷覽求高踪慨想上古士中途得
任公任公尚清素綽有古人風任處復清曠軒

溪山集 卷一
窗俯飛淙山光滿庭戶霞彩生簾籠客來共傾
倒不惜樽罍空擊缶爲我歌聲音振喬松乃知
岩穴樂可以調孤桐余亦鸞鶴侶褰裳偶相從
願子抱素志歲晏聲

題觀蘭扇面

林下有高士夙愛徵湖清終日看不足似得湖
水情滉漾際天地吞吐涵日星一儀具在眼萬
象焉迹刑

題蘭菊扇面

佩香必佩蘭采芳須采菊菊可頽制齡蘭宜君
子服請觀晉之陶何如楚之屈二公同一揆千
秋良可卜

題山水扇面

林下春風來千季翠如璧雲擁羣木深溪迴百
川寂中有幽人居清朝此投迹邂逅得良朋於
焉之嘉客

酬高漫士先生見訪

夫子在青盼觸暑來長途攜手入我室愛我如

明珠好似徐元直一見稱鳳雛感此謝知已愧
我無良圖胼胝在畝畝疲弊事樵漁明時竟何
補暗室空長吁惟時適閒暇相與命巾車升登
恣遐賞勝似游天都飛神馳六合逸氣凌九區
安得常依歸爲君攜玉壺

贈表姪劉孟升

劉生性耿介皎若秋壺冰不肯混一物照見四
坐清良朋古所貴直諒資豪英夫何薄俗態諂
笑分前征

遇隱者以共問答語續成一首

愛子久未識一見情更真瀟灑酒有風槩豈是尋
常人高臥不出山只在青雲裏口絕當世務心
蘊帝王執問君何不仕大笑非所疑周黨人共
稱王良衆所鄙採我林下木飲我溪頭流子言
復何如茲山期永天

古錦詞

妾有一匹錦欲作春風衣珍重不肯着十載藏
光輝時時自拂拭彩色生羅幃不繡閒花草只

作雙鴛飛天寒針線冷誰念妾心違

詠梅

不厭籬邊陋不嫌山路荒托根隨處所寂莫亦
何傷冷蕊笑寒水踈枝依短墻春風如得力冉
冉占羣芳

秋風

蕭條起天未颯爽下簷隙荒林蕩欲空幽齋愁
更入有感時事遷迥然幽思集白雲胡為來陰
醫終日夕

大堤曲

大堤香風回漢水波光暖雜遝女郎遊聯翩釵
鈿遠沽酒喬木陰摘花芳叢晚見之不可求脉
脉莫能返

感興

灼灼道傍花依依堤上柳榮華曜一時誰人不
回首顏色信可憐春風不長久有酒且自斟毋
為嘆衰朽

前出塞

溪山集 卷一
壯士不惜死出門寧顧家擔將龍泉劍殪彼漁
陽犯出師動以正勝負相倍加戒爾三軍士卒
勤莫咨嗟

後出塞

荷戈出門去親戚送我行各攜一盃酒相勸事
長征虜馬飲河朔胡塵暗東京努力報奇策一
掃攬撻平

塞上曲

十月朔風塞長天吹雪霰征馬跨玉鞍塞下如

飛電猛士十萬人駢弓鵬羽箭朝敗左賢王暮
復渡河戰驍驍霍將軍師奏未央殿

塞下曲

長城連大漠紫塞控邊陲千騎黑稍軍落日轅
門裏不戰氣偏驕角逐心更喜嘗聞衛霍功得
遇風塵起如今息功利令人愁欲死

薇峰八詠

蒼蒼紫薇峰藹藹綠烟樹樹深山更好賞玩成
佳趣秀色迥不羣清輝美無度安得凌其巔從

身聽天步

右薇峰烟樹

神物九碗蜓吐沫成溪水飛淙下林壑宛若驚
虹起怒悍信流行迴旋亦坎止玩物有餘功因
之得至理

右龍湫瀑布

禪宮絕喧囂勢與塵寰隔曙色動疎鐘千門聲
歷歷響逐江風長靜隨山月寂擾擾昏晨聞鏗
銅幾時息

右巖寺曉鐘

方春泉脉動千村農事殷凌晨飯牛去家家同
駿奔雙駕雨中作百耕登高原始知遺安業可
以貽後昆

右竹寺春耕

清溪深且廣游鱗無曝腮洋洋各自適旣去仍
復來緬彼垂釣翁終日坐蒼苔安知投繯意不
與古人偕

右玉溪晚釣

西山宜落日乃在桑榆間泛泛霞彩動啞啞飛
鳥還倒影麗穹漢餘暉徧巖巒安得魯陽弋揮
之起顏顏

右福巖夕照

白鶴橫空返樵夫荷擔歸歸來憇高嶺夕露沾
人衣遙望去時徑隱隱苔路微辛苦且棄置幸
然無是非

右鶴嶺歸樵

幽洞啓神秘靈贖日續紛祥光發瑞氣麗景生
晴雲萬象照寒谷五彩明朝暎載歌仰嘉運亦
足觀乾文

右鳳洞晴雲

留別周仲器董叔魯二友兄時在靈峰寺
古刹中夜起振榮思長征迴廊具素飯飲酒不
盡觥軟語尚可冀去意終難嬰君家亦不遠喬
木望中青

溪山集卷之一終

盡飄輝尚何冀生意絲縷嬰吾家亦不羨喬
古條中交跋燕榮思尋五風瀛具素鷄增醜不
人衣留限周中器董味魯二文只執五靈袖幸
然無是亦鳳歐韻雲

只購諱文

翻雲萬象照寒谷正深出時潮蓮福前嘉事亦

溪山集卷之二

溪山愚叟陳航著

七言古體

行路難

少季志氣壯讀書欲匡君州邑不肯顧鸞臺難
立勳日穿常望選場闢誓將文藻登青雲一入
棘闈數不偶退思紙筆徒紛紛羞將筐笈返吳
楚賣書買劔去學武聞道匈奴入雁門期欲爲
君破驕虜身作先鋒遠渡河褰旗陷陣俘馘多

法山集 卷二
一
功在軍中爲第一 主將不錄將奈何 投戈棄甲
歸舊隱 灞陵亭下吏敢呵 蕭條巷裏僅懸席 寂
寞門前堪設羅 吾生出處只如此 世路悠悠寧
足恃 君不見子房早逐赤松遊 辟穀高眠誰得
議

結交行

古人結交重相許 刎頸捐生後人慕 傾心瀝膽
過弟兄 意氣昂藏誰敢顧 一朝勢去事稍移 外
貌未變心已離 臨危忽作安身計 前時相許成
相欺 君不見張耳陳餘最相愛 印綬畢竟何人

佩

編脩兄席上歌

吾兄大才見童稚 口不妄言性強記 如今果作
玉堂人 富貴功名惟直致 今季承恩歸故鄉 登
堂拜母稱壽觴 閩中八郡幾人見 頓令閭里生
輝光 華筵肆設邀雁行 雄詞逸氣多慨慷 鷓鴣
敢比鴻雁翔 駑駘不得爭乘黃 清泉白石果何
有 黃花笑我鬢眉蒼 安得乘風破巨浪 願隨驥

尾學騰驤此事恐非吾所了北窗正可臥羲皇

石門樵者歌

朝磨我斧夕礪我斤大笑出門去長歌穿白雲
寧知王質柯爛貴馬識買臣卿相尊惟知採我
樵荷擔東西奔龍龕嶺上莓苔濕大溪御國高
嶺岷四時攀躋不彈遠自言可以清心魂

溪山愚者歌

溪山愚溪山愚溪山愚者是老夫老夫一生百
技無心無適莫才空踈食只蔬食居惟草廬出

門見朋友不敢遙相呼低頭避權勢有類轅下
駒林栖野處分已定卉衣布襪常晏如長嘯丹
岩裏行歌綠水隅孑然知己少偏得事樵漁東
隣西舍相勞苦隻雞斗酒成歡娛科頭箕踞衡
門下安用富貴爲良圖

春風顛歌

平生不信春風顛日日買醉春風前今朝始信
春風惡桃花作雨柳絮飄綿衝狂擊盪上復下澎湃
奔騰如駑馬恍疑威動四極陸又若氣震長平

瓦遊人郊外意頗愁巨觥起浪難獻酬不如挈
榼且歸去呼童載酒發南樓

采珠謠

南州蛋子背如漆白日沉波水中立文身不憚
海族欺掉臂喜對鮫人泣我聞合浦珠有神蚌
螺俱是連城珍神光直騰牛女宿瑞氣壓倒東
西津居人季季入海底齋糧貯火連江渌自言
此土不鉏犁只採神珠供耒耜昔季太守何貪
污神珠盡徙他鄉隅江頭生民半餓莩水邊苔
蘚多模糊邇來數載珠稍還眼前幾屋皆恬安
復道誅求使者急相逢無語淚潛潛

賦得石上草

石上草何營營團團翠碧沿岩生季季雨露滋
不長歲旱乾枯應復萌根托紫泥裏葉竝白雲
橫恍疑九節長生餌又若芝木插金莖老夫不
可結樵子難爲薪豈是天公愛靈物護此石上
季季春

奉孟律先生

騷壇將子鳴天鼓指揮左右如風雨敵國英雄
不敢謀盡向麾幢作降虜悠揚出入三百篇片
言美刺辯媿妍麗句佳詞人膾炙長歌短引思
陶甄愧我愚才喚難醒久處囊中難脫穎願將
布鼓冒雷門殷殷爲我開心魂

三馬圖

渥洼少神駿冀北無良駒空羣起長嘆白璧將
奚沽君不見汧渭如雲亦如此龍種不遇駑駘
呼今君此馬從何得毛髮權奇高骨格一疋堅
耳目流光四蹄將蹙層冰裂一疋緩步踏莎行
細嚼生芻更有情悲鳴尚未受銜勒連錢汗血
天生成後來一疋何蕭索龍脊摧殘思俯拾精
神無復戰場時色相猶爲人愛惜此中三馬誰
最强壯者老者略相當乃知畫師有深意欲人
識得真乘黃

丙戌金陵作

金陵大道平如砥翠瓦雕甍相對起甲第縱橫
盡王家金鞭絡繹多戚里王家戚里遙相連平

溪山集 卷二 五
堤走馬去朝天騎簇通衢看似繡香連內苑色
疑烟烟連騎簇真堪玩倏忽朝回更蕭散五侯
賓從集如雲四夷門館多迎款湏臾教樂從天
來齊歌趙舞皆柔諧愧我儒生眼未識日逐羸
馬隨飛埃飛埃撲人心草草風光只在長安道
故鄉回首白雲遙歸去南山且終老

大溪山


大溪昔日風光好十家五家同一保雞犬相聞
達曙喧曉鐘迺擊無昏早山人居山只食山種

得稻梁心亦閒取柴斫竹白雲裏築垣分泉綠
樹間山人於此自云樂飽食安眠甘淡薄里胥
無復夜驚呼足跡都忘到城郭梵宮禪伯亦風
流輒與文人相唱酬僧堂懶作六時禮客館偏
能幾日畱吁嗟此事猶眼見倏忽光陰去如箭
至今惟有三家村出入豺狼心膽戰相逢路上
多含哀辛苦如何說得來只將筋力付流水空
把形容同死灰

射虎詞

請君毅長弓爲我射猛虎
猛虎咆哮人莫當
知君百步更能取
趨羣不讓昔裴昊
除害更作今周處
惟時太守無劉昆
善政不曾聞一舉
雖施檻阱祇勞民
愈見於菟來接武
生民無計樂樵蘇
畜養何由安牧圉
伊予頗懷拯物情
見此異物心悽楚
凌晨磨礪金僕姑
願從壯士歷虎所
縱非古人化暴心
亦足釋此眼前苦
嗚呼壯士聽吾歌
彎弓挾矢當吾與
食安別在
龍龕禪寺追和王高二太史題壁詩

永樂甲午皆山王先生來別中書兄時
同遊靈峰題詩於壁及待詔高先生來
亦屬和焉竊思二先生俱一代偉人高
風逸韻發爲聲詩足爲此山增重愚生
也晚敬仰休光自忘淺陋僭步後塵後
來遊者雄詞健筆馳騫於粉壁長廊之
間何莫非自愚而發之也耶
海上靈山孕神秀
萬木蒼蒼碧雲溜
山頭霽色襯朝霞
樹裏嵐光空晚照
塵囂迥隔絕
纖埃金



仙之宅如蓬萊神房半自花間出定室多從松
 下開勝槩岩嶷真絕境日極神馳與俱永飛岩
 踏上聽天雞疊巘攢雲愁半嶺終南太華休爭
 奇其中佳趣人不知岩扉靜掩薜蘿月法水光
 涵祇樹枝不用傷心怨遲暮且須載酒隨玄度
 玉堂詞客解長歌揮酒何須便歸去自笑狂吟
 非等倫麗句從來貴有隣他季詔許還山日結
 社應須訪舊人

溪山集卷之二終

溪山集卷之三

溪山愚叟陳航著

五言近體

子房圮橋進履

博浪摧車日圮橋進履時老人深有待孺子不
 愆期佐帝無遺策謀身亦自奇功成能勇退高
 尚志熙熙

山中作

空谷何曾出深林但隱棲采樵探古穴把釣傍

清溪雲氣侵衣重山容入戶低只緣忘世事不
是慕夷齊

帶湖樓

樓枕大湖頭飛甍瞰碧流澄清波底月馴狎水
中鷗信美幽棲處真堪物外游閒招陸魯望日
夕共賡酬

山莊訪友

隔水問柴荆行行認犬聲野花當戶發谷鳥傍
人鳴地僻堪招隱朋來暫輟耕惟應三徑裏斗

酒話平生

題友人幽居

茅屋倚幽岑繁陰四面侵崦嵫雲氣遠瀾壑水
流深學苦爲憂道身閒遂賞心扁舟江上客知
爾有佳音

題喜鵲圖

盛世巢堪俯明時雪作衣性靈知客至氣淑近
人飛駕彩星輝迥成橋月影微誰言霄漢遠幾
度拂雲歸

溪山集 卷之三
開戶能知歲營巢解識風酬恩傳赦令化印兆
侯封報喜如啣信占歸若效忠慈鳥亦好鳥惟
爾可相從

溪山集卷之四

溪山愚叟陳航著

七言近體

寄宗度表兄宗和表弟

憶隨慈母拜高堂日逐嬉遊上下忙
蹴踘屢經三寶寺揮盃又過陸渾庄
百季恍佛如風燭兩鬢蹉跎似雪霜
尚想小時行樂處未知何日共翱翔

寄南海廣文戴士賓

聞君教雨向南訛濟濟英才樂詠歌逸興遠連
滄海濶歸心遙帶白雲多荔枝滋味能同否豈
寇根苗有異麼我欲憑君問風土好題書札寄
烟蘿

送周典幕弟歸

千里辭家念友于閩南重見燕飛初親闈每恐
晨昏隔客舍仍憂歲月徂獨有公田餘祿米別
無長物混琴書應知此去趨庭日雙璧連輝照

里閭

秋興

龍龕高聳出烟霞御國低迴接海涯淺草牛羊
隨處放深林猿鶴自成家江潮洶湧朝仍暮沙
逕透迤曲又斜季少此遊今白髮倚筇無奈數
歸鴉

閒居

野處明朝愧不才衡門常爲掃花開松邊教鶴
遲遲舞竹下呼雞款款來酒到霜前還詠菊詩
吟雪裏屢尋梅傍人不必談踈放自分甘心似

死灰

文峰小隱

高人住處倚林丘
門對澄江萬頃流
千尺波光春雨裏
一簾山色暮雲秋
野花啼鳥常當戶
飛絮遊蜂亦近樓
何日相逢同握手
文峰高處共賡酬

文峰高聳出烟霞
中有幽人小隱家
塵榻每因高士設
清尊肯為故人賒
門前廣種陶家圃
園裏仍栽邵氏瓜
見說功名渾忘却
只將三徑作生涯

生涯

耕隱贈鄧定

京國無心往策勳
只從南畝樂耕耘
春風播種乘膏雨
曉日扶犁候慶雲
名著朝廷徵士籍
心隨林壑野人羣
人生適意如君少
出處雍容到處聞

帶湖樓

有客新從鶴嶺遊
為余高話帶湖樓
風來水面玻璃合
雲去山腰紫翠浮
日晚樵歌歸浦溆
夜

寒漁唱起汀洲吳航勝槩雖層出不似登臨到
上頭

再東帶湖主人

休文何事減腰圍每日高樓坐不歸愛客真如
忘寢食對人渾若不勝衣凭欄細數桃花落卷
幔閒看越鳥飛似此清幽猶恨少更移釣艇傍
苔磯

甲寅歲立春諸弟飲于祠堂喜而有作

春盤生菜縷絲精薄餅團來味更清忽訝佳殺

方丈蒲更教美酒十分傾韶華漸迫花枝暖風
力猶疑蝶翅輕見說三朝今又近好來重守歲
寒盟

題劉孟升所藏中書先兄遺墨

賢兄翰墨足傳芳廿載詞林沐寵光撫卷忍看
今日淚題詩猶斷舊時腸東西閣老偏珍重南
北名家更寶藏試問至今誰最愛尚聞有士在
筓壽陽

江村卽事

平蕪縹渺浩無烟禾黍高低遍野田
饁婦攜筐遵小徑農夫荷鍤覘荒泉
場坡瓜熟風當戶滄海漁歸月在船
更喜清時無寇警長江迤邐得安眠

臨清亭

臨清亭上昔曾遊景物於人足唱酬
靈寺月明踈磬遠澄江日暮片帆休
滿簾紫翠天開畫繞屋笙歌鳥弄
喉聞說近來多勝賞風光得似習池
否

溪山集卷之五

溪山愚叟陳航著

五言絕句

題衛之衡雲松軒

灑灑九江水蒼蒼五老峰昔人愛佳
絕曾此臥雲松

閨怨

出外三季別中間一字無如何求快
婿反得薄情夫

大閨思

欲睡理殘香
氤氳暗近床
傷心懷久別
珠淚忽成行

題畫牛

豐草厚如苔
大坡平若砥
雙笛倚風吹
竝跨斜陽裏

秋閨詞

日落北風寒
愁人正倚欄
雁行空數盡
不見報平安

促織詞

促織何須促
貧家已自知
傷心如古槓
未冷更攢眉

七言絕句

和贊善叔父尊韻

千里懷人念故鄉
應多感慨遇重陽
殷勤盡在詩編裏
目極南天憶雁行
金風淅淅動秋寒
爲愛黃花更護欄
不識山林多逸興
何如翰苑捲簾看

自笑駑駘戀故鄉空瞻鸞鳳對朝陽
臨毫欲寫相思字寄向飛鴻第幾行
乾坤放却一閒身風月無邊不患貧
好客相過母載酒茶翁元是獨醒人

山水圖

數里平沙接遠村千重喬木蔭柴門
可人最是滄洲晚潮落依稀見水痕

畫馬

天馬曾聞出肉髯千見喜復見真龍
飛塵不動

郊垆遠可惜孫陽眼未逢

逸氣渾如不受羈綠陰深裏跨雙蹄
何當一展追風足直到崑崙碧落西

閒居雜詠

信是季來不奈閒只將清興伴雲山
緩行溪上看魚戲懶去松邊待鶴還
綠樹陰陰覆釣磯桃花浪暖鰕魚肥
絲綸未放深淵裏且看交鵲水上飛

荆軻

俠骨干季死更香于今誰復數秦王可憐
悲歌地猶使行人眼倍光

許由棄瓢

瓢棄滄波去不還歸來林下更閒閒
眼前便覺無餘累一任天風起樹間

題扇面小景

相逢林下喜同羣終日清談謝垢氛
何處扁舟川上去莫教衝破一溪雲

溪山集卷之六終



